

## **Njoftim mbi ndryshimin ligjor në procedurat e rimbursimit të TVSH-së për OJF-të e financuara nga grantet që marrin nga donatorët e huaj**

Drejtoria e Përgjithshme e Tatimeve njofton tatimpaguesit OJF mbi ndryshimin ligjor në Udhëzimin Nr. 6, datë 30.01.2015 "Për tatimin mbi vlerën e shtuar në Republikën e Shqipërisë", i ndryshuar, i cili sqaron procedurën e rimbursimit të TVSH-së për grantet që këto subjekte marrin nga donatorët e huaj.

Këto dispozita zbatohen kur i kontraktuari/përfituesi i grantit të donatorit, qoftë lider/koordinator, bashkaplikant/bashkëpërfitues apo nënpërfitues granti, është një organizatë jofitimprurëse (OJF) sipas kuptimit të Ligjit për organizatat jofitimprurëse, si dhe përcaktimit të nenit 3, të Ligjit për TVSH-në dhe ka lidhur një kontratë të financuar me fonde të donatorit të huaj, pavarësisht statusit të saj në kontratë.

Kusht i parë që duhet të plotësojë kontrata e grantit është që të këtë vetëm një numër identifikimi për efekt rimbursimi - edhe kur janë disa OJF aplikante - për t'u pajisur me certifikatë për rimbursim TVSH-je, në varësi të statusit të tyre në kontratë.

Nëse aplikanti është një OJF - palë në kontratë me statusin lider/koordinator, certifikata e saj për rimbursim është e vlefshme edhe për TVSH-në e paguar në blerjen e mallrave dhe shërbimeve në Shqipëri në kuadër të kësaj kontrate, nga OJF-të e tjera vendase - palë në kontratë me statusin bashkëpërfituese apo nënpërfituese të grantit.

Në rast se OJF-ja, palë në kontratë me statusin lider/koordinator, është organizatë e huaj që ushtron veprimtarinë jashtë territorit të Shqipërisë apo që ushtron një a disa veprimtari të caktuara në territorin shqiptar, e paregjistruar sipas të drejtës shqiptare me një degë a OJF të re, të drejtën e aplikimit e gëzon OJF-ja/të vendase, palë në kontratë me statusin bashkëpërfituese, për pjesën e TVSH-së së paguar prej saj/tyre dhe prej nënpërfituesve të grantit (OJF-të vendase, nëse ka) në blerjen e mallrave dhe shërbimeve në Shqipëri në kuadër të kësaj kontrate.

### **Aplikimi për efekt regjistrimi**

OJF-ja (lider/koordinator apo bashkëpërfituese) pjesë e kontratës së grantit me donatorin apo institucionin/entitetin e autorizuar/, deleguar zyrtarisht prej tij, aplikon pranë Drejtorisë Rajonale Tatimore (DRT) përkatëse, për regjistrim për efekt rimbursimi TVSH-je, brenda 90 ditëve kalendarike nga data përfundimtare e pranueshmërisë së shpenzimeve, në kuadër të zbatimit të kontratës, sipas formularit 6A dhe shpjegimeve përkatëse, pjesë integrale e këtij udhëzimi.

Formulari 6A shkarkohet elektronikisht në <https://www.tatime.gov.al/c/6/71/tatimi-mbi-vleren-e-shtuar>, <https://www.tatime.gov.al/c/6/257/262/tatimi-mbi-vleren-e-shtuar>, ose <https://www.tatime.gov.al/d/8/129/209/185/tatimi-mbi-vleren-e-shtuar> dhe pas plotësimit me të gjitha të dhënat e nevojshme, i adresohet zyrtarisht DRT-së përkatëse, duke i bashkëlidhur dokumentet e mëposhtme:

- a) kopje të noterizuar të kontratës (marrëveshjes së partneritetit) midis OJF-së dhe donatorit apo institucionit/entitetit të autorizuar zyrtarisht prej tij, për lidhjen e kontratës së financuar/ bashkëfinancuar me grant, në gjuhën në të cilën është lidhur kjo kontratë, së bashku me kopje të përkthyer në shqip dhe të noterizuar;
- b) kopje të noterizuar të kontratës në gjuhën në të cilën është lidhur kontrata/marrëveshja mes liderit/koordinatorit dhe bashkëpërfituesit dhe/ose nënëpërfituesit të grantit (nëse është e aplikueshme), së bashku me kopje të përkthyer në shqip dhe të noterizuar;
- c) ekstrakti i OJF-së nga Gjykata (dokumentacionin që provon statusin jofitimprurës, së bashku me ndryshimet që mund të ketë pësuar OJF-ja).

Afati i vlefshmërisë së certifikatës është nga data e lëshimit të saj nga DRT-ja përkatëse, deri në 24 muaj kalendarikë pas datës përfundimtare të pranueshmërisë së shpenzimeve. OJF-ja mund të bëjë kërkesë për rimbursim të TVSH-së së paguar në blerjen e mallrave dhe shërbimeve, në çdo moment brenda afatit të vlefshmërisë së certifikatës, por në çdo rast vetëm për furnizimet e marra brenda afateve të përcaktuara në kontratë për pranueshmërinë e shpenzimeve.

### **Aplikimi për efekt rimbursimi të TVSH-së**

Për të përfituar rimbursimin e TVSH-së në kuadër të zbatimit të kontratës së grantit, OJF-ja mbajtëse e certifikatës së regjistrimit të kontratës për efekt të rimbursimit të TVSH-së, i paraqet Drejtorisë së Rimbursimit në DPT, kërkesën për rimbursimin e TVSH-së së paguar në kuadër të zbatimit të kontratës së grantit, sipas formatit 6R bashkëlidhur këtij udhëzimi si pjesë e tij, së bashku me dokumentet e mëposhtme:

- a) kopje të certifikatës së regjistrimit për efekt të rimbursimit të TVSH-së;
- b) kopje të noterizuar ose origjinalin e të gjitha faturave të blerjes të mallrave dhe shërbimeve në kuadër të zbatimit të projektit në Shqipëri dhe listën e blerjeve me TVSH të bëra nga OJF-ja në kuadër të implementimit të kontratës së grantit (pjesë e formatit 6R);
- c) vërtetim nga banka me të dhënat e sakta për çdo llogari bankare të përfshirë në kërkesën për rimbursim;
- ç) vërtetimin/konfirmimin e lëshuar nga donatori ose institucioni/entiteti i autorizuar/deleguar zyrtarisht prej tij, së bashku me raportin financiar përmbledhës, listën e detajuar të shpenzimeve, raportin e verifikimit të shpenzimeve dhe raportin e auditit (nëse është e aplikueshme), për të gjitha shpenzimet për të cilat kërkohet rimbursimi i TVSH-së.

Brenda 30 ditëve pas marrjes së kërkesës, Drejtoria e Rimbursimit të TVSH-së, në DPT kryen verifikimin e dokumentacionit të paraqitur dhe procedon me rimbursimin e TVSH-së në llogarinë bankare të çdo OJF-je, të vënë në dispozicion në kërkesën për rimbursim.

Në rastin kur OJF-ja nënshkruan një kontratë me një njësi shpenzuese të qeverisjes së përgjithshme, që vepron si autoritet kontraktues në kuadër të zbatimit të projekteve të ndihmës IPA nën regjimin e menaxhimit indirekt, apo të një marrëveshjeje tjetër specifike me donatorin - që parashikon mospërdorimin e burimeve financiare të huaja për të paguar taksa e tatime, - TVSH-ja i rimbursohet OJF-së palë në kontratë. nga autoriteti kontraktues.

Në këtë rast OJF-ja nuk aplikon pranë Administratës Tatimore, pasi rimbursimi mbulohet nga fondi i parashikuar si kosto lokale në buxhetin e institucionit buxhetor, fusha e përgjegjësisë të të cilit, mbulon sektorin e financiar apo bashkëfinancuar nga donatori.